

SAMÞYKKT

um takmörkun hundahalds í Kirkjubæjarhreppi.

1. gr.

Hundahald í Kirkjubæjarhreppi sæti eftirfarandi takmörkunum, að undanskildum smalahundum á lögbýlum:

- a. Eigandi skal án tafar láta skrá hund sinn á hrepps skrifstofu. Við skráningu fær eigandi hunds afhenta merkta plötu til þess að festa á ól, sem ætíð skal vera um háls hundsins. Við skráningu skal hundeigandi undirrita yfirlýsingu um að hann skuli í einu og öllu fara með hund sinn eftir fyrirmælum samþykktar þessarar eins og hún er nú og síðar kann að verða breytt.
- b. Eiganda er skylt að kaupa ábyrgðartryggingu hjá viðurkenndu tryggingafélagi, þannig að tryggt sé, að tryggingin taki til alls tjóns sem hundur kann að valda án allra óeðlilegra skilyrða að mati hreppsnefndar.
- c. Óheimilt er með öllu að láta hunda ganga lausa nema minkahunda, dýrhunda og sporhunda, þegar þeir eru að störfum í gæslu eigenda eða umráðamanna. Alla aðra hunda skal hafa í taumi úti við í fylgd með manni, er hefur fullt vald yfir þeim. Eigi er heimilt að hafa með sér hunda, þótt í taumi séu, inn í skólahús, almennar skrifstofur, samkomuhús eða verslanir svo og starfsstöðvar hverju nafni sem nefnast, þar sem úrvinnsla, meðferð eða geymsla matvæla á sér stað.
- d. Hundeigendum er skylt að sjá svo um að hundar raski eigi ró manna eða verði mönnum til óþæginda. Skilyrði fyrir hundahaldi í sambýlishúsum er að allir íbúðareigendur samþykki slíkt og skal leggja fram skriflegt samþykki þar um við skráningu hunds, er gildi þar til sveitarstjórn berst skrifleg afturköllun frá einhverjum íbúðareiganda.
- e. Til að standa straum af kostnaði hreppsins við skráningu og eftirlit með hundum í hreppnum, skal hver hundeigandi, aðrir en eigendur hunda á lögbýli, greiða árlegt gjald til hreppssjóðs. Upphæð gjaldsins sem greiðist fyrirfram við skráningu hunds til n.k. júlímánaðar og síðar árlega 1. júlí fyrir eitt ár í senn skal ákveðið í gjaldskrá sem heilbrigðis- og tryggingamálaráðherra staðfestir. Heimilt er að ákveða gjald lægra fyrir nauðsynlega minkahunda, dýrhunda og sporhunda og af hundum sem blindir menn og öryrkjar þurfa á að halda vegna fötlunar sinnar skal ekkert gjald greiða. Við greiðslu gjalds þessa ber hundeiganda að sýna fullgild skilríki fyrir greiðslu váttryggingagjalds skv. b lið, váttryggingaskírteini, vottorð dýralæknis um að hundur sé ekki haldinn smitandi sjúkdómi og hafi verið hreinsaður af bandormum, svo og öll skilríki er máli skipta skv. gildandi lögum um hundahald svo og fyrirmælum sem heilbrigðisnefnd setur varðandi hunda.
- f. Sé hundeigandi undir 16 ára aldri verði honum eigi veitt leyfi til hundahalds nema forráðandi ábyrgist allar skyldur hans skv. samþykkt þessari og áriti sérstaka yfirlýsingu þar um.

2. gr.

Fyrir minniháttar brot á samþykkt þessari skal hundeigandi sæta skriflegri áminningu og greiða allan kostnað er leiðir af brotinu. Ef um ítrekað brot er að ræða eða meiriháttar brot hefur hundeigandi fyrirgert rétti sínu til að halda hund í Kirkjubæjarhreppi. Skal hann gjalda allan kostnað vegna brotsins og afhenda hund sinn til lögreglu, sem síðar ákveður hvað gert skuli við hundinn.

3. gr.

Hundum úr nærliggjandi sveitum, sem ekki eru í fylgd með eiganda eða umráðamanni svo og aðrir ómerktir flækingshundar skuli teknir úr umferð. Gefi eigandi sig ekki fram og/ eða vitjar hundsins ekki innan tveggja sólarhringa, hefur lögreglan heimild til þess að lóga

viðkomandi hundi. Merktir hundar á flækingi skulu einnig teknir úr umferð. Ef eigendur vitja þeirra eigi innan eins sólarhrings og svara til saka um brot á samþykkt þessari sé um slíkt að ræða, hefur lögreglan heimild til þess að lóga hundi án frekari fyrirvara.

Hundar, sem ráðast á menn eða skepnur, skal fjarlægja og lóga þegar í stað. Lögreglustjóri og heilbrigðisnefnd hafa eftirlit með hundum skv. samþykkt þessari og skulu þessir aðilar tilkynna hreppsnefnd án tafar um allar kærur sem þeim ber, vegna meintra brota á samþykktinni.

4. gr.

Framangreind samþykkt hreppsnefndar Kirkjubæjarhrepps staðfestist hér með skv. 22. gr. laga nr. 50/1981 um hollustuhætti og heilbrigðiseftirlit, sbr. lög nr. 7/1953 um hundahald og varnir gegn sullaveiki til þess að öðlast gildi þegar við birtingu.

Heilbrigðis- og tryggingamálaráðuneytið, 20. desember 1983.

F. h. r.

Ingimar Sigurðsson.

Soffía Magnúsdóttir.

REGLUGERÐ

um skoðunargjald ökutækja.

1. gr.

Fyrir skoðun bifreiðar eða bifhjóls sem færa ber til almennrar skoðunar ber eiganda að greiða 175,00 króna árlegt skoðunargjald til lögreglustjóra (í Reykjavík tollstjóra), þar sem bifreiðin eða bifhjólið er skráð.

Gjald þetta greiðist fyrirfram og er gjalddagi þess 1. janúar en eindagi 1. apríl. Eigi skal framkvæma skoðun bifreiðar eða bifhjóls nema sönnur séu færðar á að skoðunargjald hafi verið greitt fyrir viðkomandi gjaldár.

2. gr.

Sama skoðunargjald og greinir í 1. gr. skal greiða fyrir skoðun bifreiðar eða bifhjóls við skráningu, svo og fyrir skoðun við umskráningu hafi skoðunargjald vegna ökutækis eigi þegar verið greitt á árinu.

3. gr.

Fyrir árlega skoðun léttra bifhjóla skal greiða 75,00 krónur í skoðunargjald.

4. gr.

Reglugerð þessi sem sett er samkvæmt heimild í 22. gr. umferðarlaga nr. 40 23. apríl 1968 öðlast gildi 1. janúar 1984.

Jafnframt fellur úr gildi reglugerð nr. 783 28. desember 1982 um skoðunargjald ökutækja.

Dóms- og kirkjumálaráðuneytið, 29. desember 1983.

Jón Helgason.

Ólafur W. Stefánsson.